

**4.**

---

**P E E I V I R U K O S E H**

## TÁVÁLÂŠ RUKOSEH

---

1.

Áármu Immeel.

Tun lah kočcom mii noomâ miel.

Tun lah piáluštâm mii

já sirdám mii rähis Algaad völdikoodán.

Sun lii mii lonástâs,

sudoidân addâgâsadelem.

Hiärrá, mij kijttep tuu pase noomâ

já ruhâdállâp:

Teevdi mii Pase Jiegâinâd,

et puádáččijm tubdâd tuu táatu.

Taam ruhâdállâp mii Hiärrá Jeesus Kristus noomâst.

2.

Almalâš Iäččám,

kijtto sänistâd, mii puáhtá mijjân piáluštâs saavâ,

já stivrii mii jieččân elimist.

Iššeed mii vuáijud toos

já čiehâd tom váimusân,

amas mij suddodid tuu vuástá

já tovâttid mielâpaa mii aldemuid.

Räähiti mist ilo já ráávhu vijdedeijeid.

Kuulâ mii Algaad Jeesus Kristus,

mii Hiärrá tiet.

3.

Hiärrá, mii Immeel,

mii pirâstit murrâšij já iäpádâsâi muvrâ.

Tátuččijm oskod,

mut eellip távjá oskottáá já luáttámušttáá.  
Tátuččijm rähistid,  
mut eellip tuše jieččân várás.  
Eeči, išseed mii ooskon, tuáivun já rähisvuotân.  
Mii Hiärá Jeesus Kristus noomâst.

4.

Hiärrá,  
mij ilodep sáánád imâšlâš lopádâsâin.  
Uáinip tain ton uddâ maailm hiärváávuodâ,  
maid tun rááhtáh.  
Mij kijttep tuu,  
et lah adelâm mijjân taan ávudem  
jo eennâm alne, kuávdoo puoh murrâšijdân.  
Taan tuáivun tun lah mii koččom,  
taan almalâš uulmán táttup pissood oskolâžžân.  
Varjâl mii, et pissoop tuu uámmín.  
Taam ruhâdállâp Algaad Jeesus Kristus noomâst.

5.

Hiärrá, mii Immeel,  
tuu sääni lii putes já tuodâlâš,  
tot ilosmit vááimu.  
Tun rááhtáh mijjân juhlepeevdi  
kaskoo mii aargâ,  
ige mist lah mihheen vááijuv.  
Veik mij lep silloom,  
mij ep taarbâš ruáppánid,  
tastko tun laidiih mii  
virkosmittem já udâsmittem käldei kuuvl;  
tobbeen uázžup vuoijâdâttâd.  
Ko kenigâsvuodâi tiäddu  
uhked tármuttuttid mii,

tun iŝedah uddâ aalgân  
 uálgiskiedâd vuoimijn.  
 Tuu pyerivuotâ já rähisvuotâ  
 pirâstitteh mii,  
 já mij uážžup aassâđ  
 addâgâsadelem, ráávhu já rijjâvuodâ visteest  
 idedist eehid räi.

6.

Pase Immeel, mii Sivnedeijee,  
 Tuu lii alme, eennâm já meerâ,  
 tuu lii eellim, mon lah mijjân skenkkim.  
 Adde sivnâdâsâd kiedâidân tuojijd.  
 Possool mii jurdui purjâsâid  
 tuáivu piegâ,  
 nuuvt et pyehtip olášuttid pargoidân  
 tuu maailmist.  
 Šoddâd mist heedâlm,  
 moin puohah tobdeh mii tuu uámmín  
 puoh tast, maid porgâp.  
 Kuulâ mii ruhâdâs Jeesus noomâst.

7.

Puohvâldâlâš Immeel.  
 Tun vuolgâttih mii máátkán ääigi páruí čoodâ,  
 tun adelah šuármuid já kuálhi,  
 čááitáh väävli já sunde,  
 maid osko já tuáivu várdáv.  
 Paijeed páruí paajaabel  
 sáánád čuovâ,  
 adde tom čuovvâđ sevñâd čoodâ,  
 nuuvt et riddonep ohtii  
 tuu sáátkun.

Kuulâ mii rukkoos Jeesus tiet.

8.

Almalâš Eeči.

Kijtto ármustâd, mii lii viijdes tego alme,  
já vanhurskesvuodâstâd, mii lii aaleeb ko väärih.

Kijtto suájáidâd syejeest,  
torvopäähist, kuus uážžup toommâđ.

Piemâ mii servikodestâd arvâs adalduvâin,  
juuvât mii jieijâd ilo virdeest.

Iššeed mii kulluuttid áármu já ilo saavâ,  
nuuvt et maanġas, kiäh láá läpittâm čuovâ já tuáivu,  
kavnâččii tom uddâsist  
tuu kuvlân, eellim käldee lunne.

Kuulâ mii Jeesus noomâst.

9.

Oskolâš Immeel.

Adde mijjân ruokkâdvuodâ,  
et tuostâččijm miedettid  
jieččân hiäjuvuodâ já áppádmettumvuodâ.

Ruokâsmit mii lyettid toos,  
et uážžup lede torvoost,  
ko kyedđip jieččân tuu haaldun.

Taam ruhâdállâp Jeesus,  
mii Hiärá peht.

10.

Immeel, rähis almalâš Eeči.

Tun lah šoddâdâm leeibi enâmist  
mii rummâš ravâdâssân.

Lah vuolgâttâm Algaad Jeesus Kristus  
eellim leibin,

adelid maailmân eellim.

Ruhâdâllâp tuu:

Oopât mii jyehid jieččân leeibist toid, kiäh láá niälgum  
já adde mijjân haalu levâttid saavâ Kristusist,  
nuuvt et toh, kiäh láá niälgum, virkosmuuččii pyerivuodâstâd.  
Kuulâ mii mii Hiärá Jeesus Kristus peht.

11.

Mii rähis Pestee.

Mij čájádep jyehi peeivi luodâ alne  
já karttâp ävdinenâmân.

Tun, Jeesus Kristus,  
lah rievtiis paaimân.

Tunjin mij väidip jieččân ede,  
tuu ovttuu alestep ävdinenâmist.

Kuulâ mii, tun,  
kote lah luoddâ, tuotâvuot já eellim.

12.

Mii Hiärrá já Pestee.

Mij lep rädittemeh já vyeimitemeh,  
ko keččâlep eellid ristâlâžžân jieččân navcâigijn.

Iššeed mii oskod,  
et tun, pajaspajanâm já aalman lavkkim Hiärrám,  
ruhâdâlah ain mii peelest.

Kuulâ mii noomâd tiet.

13.

Hiärrá, mii Immeel.

Tuu kiedâst lii mii ubâ eellim.

Puoh cuovkkân já láppoo,  
jis tun jieh mii varjâl.

Tun adelah mijjân aamnâslâš puorijd,

mut mij erehtup távjá oskod  
tom jieččân ánsun  
já mii pištevâš torvon.  
Iššeed mii kiddid jieččân vááimu  
avalâš, lappuumettum lahjijdâd.  
Suovâ ubâ mii eellim alestid tuu.  
Kuulâ mii Jeesus Kristus,  
mii Pestee noomâst.

## IIDEEDRUKOSEH

---

1.

Kiijtam tuu, almalâš Iäččám,  
Jeesus Kristus, rähis Algaad peht,  
ko lah onne-uv ármulávt suojâlâm muu.  
Ruhâdâlâm tuu:  
Adde munjin puoh sudoidân addâgâs,  
puoh, maid lam porgâm puástud.  
Varjâl muu taan-uv iijâ.  
Mun adelâm jieččân,  
rummâšân já siälun, já puoh tuu kiedáid.  
Pase eŋgâlâd liävus muin,  
amas paas vajalâš uázžud maggaargin väälđi must.

2.

Mij kijttep tuu, pase Immeel, eellim adalduvâst,  
uddâ peeivist já ton máhđulâšvuodâin.  
Ruhâdállâp sudoi addâgâsadelem,  
ráávhu maailmân,  
ohtâmielâlâšvuodâ já Jieggâd udâsmitem ristâkoodán.  
Sivned evaŋgelium pargo ubâ maailmist.  
Adde pyereestpiergim rähisvuodâ tavvoid.

Adde iše toid, kiäh láá cedeest já väänist.

Joskis rukosist pyehtip tuu oovdân mii uámáhâšâid já ustevijd.

– Joskâdvuotâ –

Iššeed mii eellid nuuvt,

et mii säänih já tavoh liččii tuu mielâ miel.

Mij kyedđip mii jiegâ, siälu já rummâš tuu kiedáid.

Taam ruhâdállâp mii Hiärá Jeesus Kristus noomâst.

## RÁÁVHU RUKKOOS

---

- [**O** Pisos ráávhu tuu muuvrâin  
**S** já pyereestpiergim tuu loonijn.]  
**O** Ruhâdállup.

Hiärrá, mii Immeel.

Tun lah puoh rievtslágán jurdui  
 já vanhurskes tavoi käldee.

Adde palvâleijeidâd tom ráávhu,  
 mon maailm ij pyevti adelid,  
 et mij liččijm tuu pákkumijdâd kulâjááh  
 já puávtáččijm eellid tuu varjâlusâst  
 ohtâmielâlâšvuodâst já ráávhust.

Taam áánnup Jeesus Kristus,  
 mii Hiärá tiet.

**S** Aamen.

## EEHIDRUKOSEH

---

1.

Kiijtám tuu, almalâš Iáččám,  
 Jeesus Kristus, rähis Algaad peht,

et moonnâm iijâ varjâlih muu  
puoh paast já vaarast.  
Ruhâdâlâm tuu,  
et varjâliččih muu onne-uv  
suddoost já puoh paast,  
nuuvt et puoh maid poorgâm,  
ubâ elimân, ličij taggar maid tun táátuh.  
Mun adelâm jieččân,  
rummâšân já siälun, já puoh tuu kiedáid.  
Pase enġâlâd liävus muin,  
amas paas vajalâš uázžud maggaargin väälđi must.

2.

Immeel, tun lah peivijdân čuovâ,  
čuovvâdub ko piäivâš.  
Tun lah iijâ vuoiġâstâs,  
kienġâlub ko mii silevuotâ.  
Kijtto tast, et jyehi puudâ  
uázžup pääccid tuu kiedáid  
já lädisvuodâd aaskan.  
Liččih mijjân šalde ehidist idedân  
já cuvnâččih mijjân, ko iijâ lii moonnâm,  
uddâ peeivi já tuáivu čuovâ.  
Taam áánnup Jeesus noomâst.

3.

Immeel, almalâš Iäččám.  
Kijtto vyeimistâd já sivnâdâsâstâd  
maid adelih peeivi pargoid.  
Kijtto tuu mieldioromist vädis puudâin,  
epivisesvuodâst já áppâdmettumvuodâst.  
Kijtto tast, et ruokâsmittih mii  
uddâ já vyerdimáttum tiileest.

Iššeed mii keččâd tunjin  
 já lyettid tuu sääni lopádâsáid.  
 Kuulâ mii Jeesus noomâst.

4.

Puohváldálâš Immeel.  
 Tun lah tievâslâš tavoinâd já rähisvuodâstâd.  
 Mij tubdâp váimustân ruossâlâsvuodâ:  
 tom pyere, maid halijdep porgâd, ep poorgâ,  
 mut tom paa, maid halijdep velttid, mij porgâp.  
 Onne–uv taat suddo čyeggee mii vááimu.  
 Hiärrá, ärmittiččih mii!  
 Mij pääccip suddogâssân já koskân  
 tuu addâgâsadelem haaldun.  
 Teevdi mii toin rávhoin,  
 mii lii puoh ibárdâs paajaabeln.  
 Taam ruhâdâllâp Algaad Jeesus Kristus tiet.

5.

Immeel, Iäččám.  
 Lep kuullâm, maht olmooškodde  
 já luomakodde šyehkiv.  
 Onne–uv maangah vädis ääših láá orostittám mii.  
 Siäilut mist mieldieellim já kuoskättâs iätán,  
 ko kiinii alda teikâ kukken iälá piedgejum elimis.  
 Adde mii já ubâ maailm uáinid  
 Algaad kierdâmist já pajaspaajaanmist  
 uddâ sivnedem čuovâ.  
 Suovâ, et suu evangelium saahâ  
 puávtáččij iideed tohon, kost ulmuid tiäddá  
 toske já poččâvuodâ lopâstuttee ijjâ.  
 Kuulâ mii Kristus, mii Pestee noomâst.

6.

Pase Immeel.

Laidii mii huksid jieččân eellim sáánád kállee oolâ  
já iššeed píssood tast,

nuuvt et killáp rásuoorviid já korrâ šuármuid,  
killáamušâid, táppáámijd já jieččân hiäjuvuodâ.

Kijtto tast, et onne–uv taat kállee lii lamaš nanos.

Tun lah juáhám mijjân vyeimi vyeimistâd já ilo ilostâd.

Ko vááldáh mist peeivi meddâl já adelah iijâ,

ko ohtii vááldáh meddâl ubâ eellim,

adde mijjân kirkesvuodâ tuáivu,

adde oles peeivi.

Taam áánnup Jeesus noomâst.

## OHOPPEEIVIJ RUKOSEH

Rukoseh nuávditteh peeivi sierâ rukkoospuudâi oornig. Nuuvtpâ 1. rukkoos lii iideed várás, 2. koskâpeeivi várás, 3. eehid várás ja 4. iijâ várás (iideedrukkoos, peivirukkoos, vesper já kompletorio).

## PASEPEIVI

1.

Jeesus Kristus, mii Pestee,

mij alestep tuu jieijâd pajaspajanem juhlepeeivist.

Tun lah čuovâ avalâš čuovâst,

tun lah piäivâš, kote čyevvee taam já puáttee eellim.

Mij ruhâdállâp:

Iššeed mii kuullâd tuu sääni já nuávdittid tom.

Alestâs tunjin,

kote Eejijn já Pase Jieggáin

iäláh já haldâččah ain já ovttuu.

2.

Mii Hiärrá Jeesus Kristus.

Iššeed mii lekkâđ jieččân vááimu tunjin  
já vâldid vuástá evangelium pestee saavâ.

Adde tuu pajaspajanem vyeimi udâsmittid mii,  
nanodid mii siskáldâs häämi  
já rähtid mii rummâš tiervâsin.

Kuulâ mii, tun,

kote Eejijn já Pase Jieggáin  
iäláh já haldâšah avalávt.

3.

Pase Immeel,

tun lah asâttâm mijjân pargo já vuoijâstâs  
já adelâm sáánád vyeimi kâlden.

Piemâ mii ármuinâd,

nuuvt et mii siälu já ruumâš  
illood tust, ellee Imelist.

Mij kijttep sänistâd, mii spejâlist  
pajaspajanem čuovâ

já naanood, et Algaad Jeesus Kristus  
lii vuáittâm sevñâdvuodâ já paa vaaldijd.

Oro mii alda uddâ oho algâdijn  
já luovâsmit mii luáttámušân já tuáivun.

Kuulâ mii Algaad Jeesus Kristus,  
mii Hiärrá tiet.

4.

Kristus, Pestee!

Oho vuossmuš peivi,

čuovâ sivnedem já pajaspajanem peivi,  
lii juovdâmin ehidân.

Ij tot lamaš puohháid čuovâ peivi,

mut sevŋâdvuodâ peivi.  
Ij tot lamaš puohháid rijjâvuodâ peivi,  
mut avlij peivi.  
Ij tot lamaš puohháid eellim peivi  
mut jäämmim peivi.  
Tast huolâhánnáá, Kristus, Pestee,  
leehah mii njäälmi alestid tuu.  
Tun valdih kyeddimnáál mii sevŋâdvuodâ,  
aavlijd já jäämmim.  
Ármustâd tun páásáh ain mii kuuvl  
já tojâlah miigijn eellim leeibi,  
ko peivi lii jo juovdâmin ehidân.

## VUOSSARGÂ

1.

Hiärrá Immeel, almalâš Eeči.  
Tun sivnedih peeivičuovâ haldâšid sevŋâdvuodâ.  
Iššeed mii väldid vuástá šiev lahjijdâd,  
jyehid rähisvuodâd mii koskâvuodâst  
já vajâldid čuovâ pärnin.  
Kuulâ mii Algaad Jeesus Kristus tiet.

2.

Almalâš Eeči.  
Mij kijttep tuu tast,  
et uážžup lede tuu párnááh  
já väldid uási tuu paargon maailmist.  
Čääiti mijjân luodâ,  
maid mij kolgâp jotteed,  
já taid pargoid,  
maid táátuh mii porgâd.

Iššeed, amas mij siähánid aššijd,  
moh iä mijjân kuulâ.

Adde mijjân herkkivuodâ kuldâlid tuu jienâ.

Adde mijjân haalu rähisvuodâ tavvoid.

Kuulâ mii rukkoos Jeesus Kristus tiet.

3.

Almalâš Iäččám.

Mij kijttep tuu pargoost já tooimâin,  
moin mii kiedah já jurduuh tuáijojuh uddâ tuojijd.

Mij kijttep pargoskipárijn já pargo–ohtâvuodâst,  
mast uážžup palvâlid jieškote–uv jieijâs lahjijijn.

Lasseet mii osko toos,

et tun adelah puátteevuodâ já tuáivu

talle–uv, ko eellim oro lemin tušástuttee

já soro já kiärdámuš čuávvuv mii tego suoivâ.

Tipšo mii addâgâsadelem saanijn,

nuuvt et pisoččijm siskelâš tááhust rijjân.

Kuulâ mii mii Pestee noomâst.

4.

Pase Immeel, tun Kulmâohtâsâš.

Oho vuossmuš argâpeivi lii moonnâm,

já mij lep čuáhist ovdâstâd.

Lep čuáhist,

nubeh pargopiäivâsis tudâvâžžân,

nubeh huápus toskedmáin,

mottoom epiluhostumes muurâštmáin,

nubbe lii silloom pargottesvuodâ nuádi vyeln,

nubbe lii pargoost jo rijjân.

Maangâs mist láá čuáhist

tuše nuuvt, et jieškii–uv juurdâš tuše jieijâs vyerbi

ige mušte eres maailm aašijd.

Mii Hiärrá Jeesus Kristus,  
kuoskât mii ármuinâd,  
leehâ váimuidân rähisvuodâinâd.  
Pase Jieggâ, ellen rähtee,  
räähti ohtâvuodâ kyeimist kuáimán,  
mii siskelâšâst ubâ maailmân.

## MAJEBARGÂ

1.

Áármu já lädisvuodâ Immeel.  
Tuu oovdân pyehtip puoh,  
mii aatâšt mii,  
puoh epivisesvuodâ já liävuttemvuodâ.  
Tollii mist kiddâ,  
adde vijsesvuodâ já rähisvuodâ jieggâ  
jodettid mii saaniid já tavoid.  
Kuulâ mii Pestem Jeesus Kristus tiet.

2.

Hiärrá, teevidi mii Jieggâinâd,  
et mii siskelâšâst kolgeh ellee čääsi virdeh.  
Teevidi mii jieijâd rávhoin,  
et ruokâsmittep meiddei aldemuidân  
lyettid tunjin.  
Teevidi mii rähisvuodâinâd,  
et mii olmooškoskâvuodah udâsmeh ton vyeimist.  
Kuulâ mii rukkoos Algaad Jeesus Kristus tiet.

3.

Mii Hiärrá já Pestee.  
Tun lekkih šoohâd čoolmijd já peljitem peelijid,

nuuvt et tot, mii lâi lamaš syelimâs,  
 lekkâsij sijnân uddâ tuodâlâšvuottân.  
 Adde mijjân herkkivuodâ uáinid já kuldâlid  
 uddâ čolmijgijn já peljijgijn  
 mii aldemuu ilo já murrâš.  
 Tuálvu mii jotteeđ suin uánihis máđháá.  
 Iššeed mii uáinid,  
 et ko mij adelep, te meiddei uázžup.  
 Puádi tun fáárun, sivned taam määđhi  
 já toijâl jieš mijjân eellim leeibi.

4.

Immeel, onne–uv  
 láá mii mašineh juurrâm –  
 ain ucebáin pargovuoimijn,  
 ain teknilubbooht,  
 ain latkišubbooht.  
 Onne láá juurrâm meiddei mii tuššâdemmašineh,  
 luándu pilledem,  
 ulmui kiävhuidduttem,  
 sierrim, nelgi já suáti –  
 ain teknilubbooht,  
 ain latkišubbooht.  
 Immeel, vuolgât engâlijdâd,  
 vievsâs sângárijd,  
 varjâlid mii mist alnestân.  
 Piálušt mii jieččân puástujurduin, rijvájeijein,  
 väöldihaalust já vaijeest.  
 Vuolgât engâlijdâd laidid mii iijâ čoodâ uddâ piäiván.

## KOSKOKKO

1.

Kijtto tunjin, Hiärrám,  
et adelah áármud puohháid, kiäh tuu oceph.  
Varjâl mii onne nuuvt,  
et ep juurrâl epiooskon já eres suddoid.  
Iššeed mii,  
et puoh maid porgâp  
puávtáččij tunjin kunnee  
já olssân já jieččân aldemuid ilo já sivnádâs.  
Kuulâ mii Jeesus Kristus noomâst.

2.

Hiärrá Jeesus Kristus,  
tollii mii oskoost, et lyettip tuu máhdulâšvuodáid,  
ko mist lii mielâ patârid pargoid,  
moh oroh lemin máhduttemeh.  
Tollii mii rähisvuodâstâd,  
ko lep äpitemeh  
já jiešsujättâsâi fangân.  
Tollii mii ton visesvuodâst,  
et uážžup lede tuu uámih talle–uv,  
ko tuommip jieččân.  
Alestâs tunjin avalávt.

3.

Mii Pestee Jeesus Kristus.  
Tun lah luoddâ, tuotâvuotâ já eellim.  
Tuuttáá mij jotteep jieččân luodâi miel  
já läppip ulme, avalâš eellim.  
Varjâl, et ij ohtâgin peivi  
viäránit mii tust

ige tot, mii láppoo,  
 viäigudiččii lappuuhánnáávuodâ.  
 Tuosâ mii jieijâd riistâ čuováin,  
 et iberdiččijm,  
 mon ennuu onne–uv mii rähistah.  
 Tunjin liävus alestâs avalávt.

4.

Kristus, Pestee,  
 tuu uáppee Juudas peetij tuu.  
 Mij lep oppâm fastášid suu.  
 Kuittâg sun lâi tuše ohtâ mii juávhust.  
 Kaskoo jieččân argâoho kuáhtáp suu,  
 jieččân siste:  
 mon kollii lep jo taan oho  
 piättám joskis, huámmášmettum  
 já kievhis aldemuu,  
 mon kollii lep piättám tuu, Pestee.  
 Kristus, äärmit mii.

## TUORÂSTÂH

1.

Hiärrá,  
 ep áánu taan iideedpuudâst miänástus,  
 mut sivnádâsâd,  
 ep áánu pestim vaaivijn,  
 mut varjâlus sevŋâdvuodâ vuoimijn  
 já puoh paast.  
 Kuulâ mii Algaad Jeesus Kristus tiet.

2.

Imelâm,  
tun murâštah,  
ko mij adelep vääldi verivuotân.  
Tun kiärdáh,  
ko mij toohâp kyeimi kuáimán luhotteemmin.  
Lohđut mii pačarâsâstân,  
et puávtáččijm tuálvuđ lohđuttâs toid,  
kiäid eellim lii keččâlâddâm,  
kiäh láá šlundom já tuáivuttemeh.  
Kuulâ mii rukkoos Jeesus noomâst.

3.

Immeel, mii almalâš Eeči.  
Mij kijttep tuu tast, et anah mist huolâ,  
tuálvuh käldei luusâ,  
ko pakkâ já koškes pieggâ possool mii paijeel.  
Tun pajedah eejiaskasâd,  
ko uhkekoveh pajaneh mii mielân.  
Tun nanodah, et lah stuárráb  
ko mii palo puátteevuodâ kozzâšist.  
Toolâ mii jyehi peeivi torvopäihistân,  
tuu aldasijn,  
já teevidi váimuidân iiloin já rávhoin.  
Kuulâ mii rukkoos Jeesus noomâst.

4.

Onnáá eehid, Kristus,  
čääiti mijjân, mon alda tun puádáh mii,  
ko adelah jieijâd leebist já viijnist.  
Távjá vyejettep tuu argâpeivistân,  
pase ohtuuvuotân, alme olluvvuodáid,  
et uážžup jotteed jieččiis pálgáidân.

Mut tun puádáh kaskoo mii eellim,  
 mii jieččiivuodâ, mii vaje já toske,  
 aaibâs alda.

Tun eedah vyeligávt:

»Väldid já puurrâd,  
 väldid já juuhâd täst, tij puohah.»

Nuuvt tun pyeredah mii puácuvuodâid,  
 nuuvt labdah mii puohháid,  
 aaibâs alda.

Kristus, tuu mij alestep,  
 tuu vijsesvuodâ já tuu rähisvuodâ.

## VÁSTUPPEIVI

1.

Hiärrám Jeesus Kristus.

Tun lah kiärdám riistâjäämmim mii peeleast  
 já koččom mii jieijâd máttáättâspärnin.

Putteest mii suddoost  
 já luovâsmit puoh aavlijn.

Čääiti mijjân luodâ toi kuuvl,  
 kiäh ahevušeh addâgâsadelem já lohđuttâs saanijd.

Kuulâ mii, tun, kote iäláh já haldâšah  
 Eejijn já Pase Jieggáin ain já ovttuu.

2.

Kristus, jis tun jieh liččii feerim ulmuu kivsádâsâid já toske,  
 mist ij liččii kihheen,

kote iberdičij mii atâštâs já epituáivu.

Jis tun jieh liččii jottáám kiäinud,  
 mii tuálvui tuu jämimân riistâ alne,  
 mist ij liččii addâgâsadelem já sovâttâs.

Hiärrá, čievâ mii rähisvuodâd suáján.  
Tunjin liävus alestâs avalávt.

3.

Rähis Pestee.

Tuu pase ristâ, sovâttâs muorâ,  
paijaan onne–uv jieijâd servikode kooskâst.

Oro alestum jieijâd riistâjämimist  
já sovâttâs säänist, maid uázžup kuullâd.

Varjâl, et ij ohtâgin kieves  
viäigudiččii mist piäluštâs kiäinu  
ige riistâ čielgâ saavâ.

Iššeed tom, kiän uámitobdo sujâlâšvuotâ tiäddá  
já rávhuttesvuotâ moivee,  
puaránid já kavnâd ráávhu  
tuu haavijn.

Tunjin liävus alestâs avalávt.

4.

Kristus, Pestee,  
toh, kiäh oinii tuu kiärdámušâid alda,  
merkkejii pajas  
tuu šyehkimijd Getsemanest,  
tuu čuárvum Golgatast.

Mii huolah  
já taan maailm larmâ  
časkâtteh tuu jienâ kulluumáttumân.

Kristus, Pestee,  
leehâ mii vááimu já peeljijd  
kuullâd tuu jienâ.

Äärmit mii.

## LÁVÁRDÂH

1.

Hiärrá Jeesus, puádi mii vááimun.

Pyevti puádidijnâd áármu já ráávhu.

Mii maailm lii tievâ rávhuttesvuodâ, kadâšvuodâ já vaje.

Tot kuádá mii kuárusvuotân já epituáivun.

Adde mijjân sääni neelgi já áármu ahheev.

Piemâ mii alme leibijn.

Kuulâ mii, tun, kote iäláh já haldâšah

Eejijn já Pase Jieggáin ain já avalávt.

2.

Mii Pestee Jeesus Kristus.

Tun ettih,

et puohah, kiäid pargoh já nuádih teddih,  
uázžuh puáttid tuu kuuvl.

Tun lopeedih vuoiñâstâs.

Mij–uv puáttip tuu kuuvl,

mij, kiäid huolah teddih,

mij, kiäid eellim keččâlâd,

mij, kiäh ep ubâ tiedegin,

maid mij kolgâččijm ruhâdállâd.

Mij tuostâp puáttid,

tastko tun jieh asâttâm

vátamušâid ege iävtuid.

Hiärrám, adde mijjân vuoiñâstâs,

teevdi mii jieijâd rávhoin.

Kuulâ mii, tun, kote iäláh já haldâšah

Eejijn já Pase Jieggáin ain já avalávt.

3.

Avalâš Immeel.

Kiäluh suáittih eellim já jäämmim saavâid,  
ilo já murrâš saavâ.

Kijtto elimist, ton puoh adalduvâin,  
iideed, koskâpeeivi já eehid puudâin.

Kijtto rähis ulmuin já ovdâsvástádâsâst,  
kijtto sivnádâsâstâd, monttáá ij ohtâgin mii tavoin  
sáárnu pyerivuodâ já rähisvuodâ kielâ.

Putteest mii tuu addâgâsaddelmáin  
já adde mii juhlepihtâseh pajalist  
peessâd kirkes já lappuumettum piäiván.

Kuulâ mii Algaad Jeesus Kristus,  
mii Hiärá tiet.

4.

Immeel,

ko lijjih sivnedâm maailm, tun vuoijâstih,  
tastko maailm lâi vaalmâš.

Puoh tun lah pyereest ráhtám.

Tääbbin tun aasah miigijn,  
já veik mij lep nyeskidâm tuu maailm,  
tun sivnedah uddâ aášijd Kristusist.

Tääl tun kočoh mii joskâdvuotân já vuoijâstâsân.

Mon hiärvááh láá tuu orroomsajeh,

Hiärrá Sebaot!

Mii váimu ruáppán käibidmist,  
ko tot ahevâš tuu temppâl ovdâkârdináid,  
mii siälu já ruumâš paijeed ávudemčuárvum,  
ko mij puáttip tuu oovdân, ellee Immeel.